

мнозех днех ослепе: нападе на обою очию его яко чешуя. Евстафий же по малу начат ум свой собирати, и каются о гресех своих, и о преслушании, еже содея. И пришед паки в церковь святого Николы, и припаде прилежно к чудотворному образу, и нача плакати и каются греха своего, глаголя: „О великий чудотворче святителю Христов Николае, возвеличенный от Господа на небеси и прославленный на земли в чудесех! согреших пред тобою: не послушах твоего повеления, якоже изволи“. И абие в той час прозре, на чудотворный образ зря, и бысть глава его без болезни, и очи его здравы быша, якоже и преже. Евстафий же вборзе взял чудотворный образ святого Николы, и жену свою Феодосию, и сына своего Евстафия, и единого от клирик церковных, и остави дом свой, и град, и все имение свое. И ятся пути, помолився всемилостивому Спасу и пречистой его Богоматери, и великому чудотворцу Николе угоднику его, чтоб ему по чудотворцову изволению получитьи землю ону, преже нареченную, и управил бы путь его с миром. И помысли хотя итти вверх по Днепру по порогом мысляше ити за Днѣпр и Половецкую землю пройти до Резанския земли, уповаше бо на великаго чудотворца Николу, яко той сохранити его может от поганых половец и доправити его до Резанския земли. И незбысться мысль его тако: паки великий чудотворец Николае явился ему, и возбрани ему ити чрез поганых половец землю. И повеле ему до устья Днепрского ити Понтийским морем в море Варяжское во области немецкия, и паки сухим путем ити до великаго Новаграда. И оттуду ити до Резанские земли невозбранно, и от того великаго Рускаго мира честь приемли мене ради. Евстафий же пойде, яко же чудотворец изволи, и путь ему правяше. И доиде устья Днепрскаго Понтийского моря — се же слово море Руское. И седе в корабль и доиде моря Варяжска, и прииде в немецкия области во град Кесь. И пребысть мало дней, и пойде сухим путем по Немецкой земли. Великий же чудотворец Николае нача путем великия чудеса творити немощным, исцеления даровати различными недуги болящим — верным и неверным, якоже не мощно исчести или писанию предати. И вси прославляху бога и угодника его святого чудотворца Николу. И прииде Евстафий со иконою в Великий Новград. Чюдеса же от чудотворнаго образа святого Николы ту многи быша. Враг же диявол хотя Евстафию спону сотворити. Жена бо Евстафиева возлюби Великий Новград, хотя ту вселитися и жити. И не хотя ити во след чудотворнаго образа, и скрыся от мужа своего на мало время. И абие разслабеша вси уды телеси ея и бысть, яко мертва, и недвижима. Токмо едино дыхание в персех ея баше. И нецый сказаша Евстафию, яко жена его при кончине живота баше. Евстафий же услыша, яко жена его при смерти, припаде к чудотворному образу и начат молитися со слезами рече: „О великий чудотворче святителю Христов Николае! Прости рабу свою согрешила ти есть, яко едина от безумных жен, и даждь ей милость свою и исцеление“. И абие в той час исцеление получи. Евстафий же, взял чудотворный образ святого Николы, иде в путь свой радуясь, хотя